

Inissiani attartortittakkani ineqarnermut tapiissutit pillugit Inatsisartut inatsisaat

Kapitali 1

Aalajangersakkat nalinginnaasut.

§ 1. Ineqarnermut tapiissutit Inatsisartut inatsisaat manna malillugu inoqutigiinnut, inissiami attartortittakkami, inissianik attartortitsisarneq pillugu inatsisiliorneq qaqugukkulluunniit atuuttumi ilaatinneqartumi najugaqartunut tunniunneqartarput.

§ 2. Inoqutigiittut isigineqarput inersimasut meeqqallu tamarmik inissiami aalajangersimasumik najugallit.

§ 3. Init najugarineqartut najugaqartunut naleqqiullugu ataaseq sinnerlugu amerlaneruppata ineqarnermut tapiissutit tunniunneqarsinnaanngillat.

Imm. 2. Pissutsit immikkut ittut pissutissaqartippassuk imm. 1-imi aalajangersakkanit kommunalbestyrelsi immikkut akuersissuteqarsinnaavoq.

§ 4. Ineqarnermut tapiissutit tunniunneqarsinnaapput taamaallaat inissiani attartortittakkani ineqarnermut akiliummut.

Imm. 2. Atuinermi aningaasartuutunut atuinermilu akiliutunut ineqarnermut tapiissuteqartoqarneq ajorpoq.

Imm. 3. Inissiani attartortittakkani ineqarnermut akiliutit inissianik attartortitsisarneq pillugu inatsisiliorneq qaqugukkulluunniit atuuttumi nassuiarneqarput.

§ 5. Inissiani attartortittakkani akiliutunut tapiissutit inigisamut akiliutit annertussusaat, najugaqatigiillu tamakkiisumik isertitarisaat aammalu inissiap pissuserisaa naapertorlugit taamatullu najugaqatigiinni 18-t inorlugit ukioqartut amerlassusaat naapertorlugit aalajangersaavigineqartarput. Pensionisialimmut tunngatillugu taasumap isertitarisaanit 4.100 kr.-nit ilanngaatineqartassapput.

Imm. 2. Inissiani attartortittakkani akiliutunut tapiissutit pissarsiarineqarsinnaanissaanut aammalu akiliutip malunnatilimmik allangortussaananut, najugaqatigiit isertitarisaasa malunnaatilimmik allangorsimanerannut, inigisap pissuserisaata allangortinneqarneratigut imaluunniit meeqqat 18-t inorlugit najugaqartut amerlassutsimikkut allangornerannut tunngatillugu tamatuma kingunersaanik akiliutunut tapiissutit tamakkiisumik isertitariligassat toqqammavigalugit nutaamik naatsorsorneqartassapput.

Imm. 3. Meeqqat angerlarsimaffimmi najugaqartut ilanngullugit naatsorsuiffigineqartarnerat pissaaq qaammatip taasumap 18-liiffissaa naanissaa tikillugu. Kommunimut nalunaaruteqareernerup kingorna meeqqat 18-t inorlugit ukiullit naatsorsuinermit ilanngunneqassapput nalunaaruteqarnermit qaammatip tulluuttup aallaqqaataanniit.

§ 6. Ineqarnermut tapiissutininik qinnuteqartoq qinnuteqartup ineqarnermut tapiissutininik tunineqarnissaanut naliliinissami paasissutissanik pingaaruteqartunik aammalu ineqarnermut tapiissutininik kommunalbestyrelsip naatsorsuinissaanut paasissutissanik suugaluartunik paasissutissiinissaminut pisussaaffeqarpoq.

Imm. 2. Pissutsit ineqarnermut tapiissutininik pisinnaanermut aamma kommunalbestyrelsip ineqarnermut tapiissutininik naatsorsuinissaanut pingaaruteqartut allanngorneri pillugit ineqarnermut tapiissutininik tunineqartoq kommunalbestyrelsimut nalunaaruteqarnissaminut pisussaaffeqarpoq.

Imm. 3. Paasissutissat imm. 1-2-mi taaneqartut qinnuteqartup imaluunniit ineqarnermut tapiissutininik pisartagallip nassiutinngippagit, kommunalbestyrelsi paasissutissat pisariallit pillugit eqqoriaalluni aalajangiisinnaavoq.

§ 7. Kommunalbestyrelsi tunineqartup ineqarnermut tapiissutininik tunineqarnissaanut aamma kommunalbestyrelsip ineqarnermut tapiissutininik naatsorsuinissaanut nakkutiginnissalluni pisussaaffeqarpoq.

§ 8. Ineqarnermut tapiissutit tunniunneqassapput inoqutigiit ukiumut aningaasarsiaat § 5-imi maleruqaqqusat malillugit naatsorsorneqartut ineqarnermut tapiissutisisinnaanermut killissarititaniit appasinneruppata. Tapiissutisinissamut killissarititaniit appasinnerusunik inoqutigiit isertitaqartartut ineqarnermut akiliutip ilaata agguaqatigiissinnera namminneq akilertassavaat.

Imm. 2. Ineqarnermut tapiissutininik naatsorsuinermit piumasaqaatinik, § 5 naapertorlugu, taassuma ataani tapiiffigineqarnissamut killissarititanik, nammineq akiliutissanut kiisalu ukiumut ineqarnermut tapiissutit minnerpaaffissaannut annerpaaffissaannullu malittarisassanik erseqqinnerusunik Naalakkersuisut aalajangersaasinnaapput.

§ 9. Inissiani attartortittakkani ineqarnermut tapiissutit ukiup naatsorsuiffusup naanerani aamma § 5 naapertorlugu iluarsiiiffigineqartarput.

Imm. 2. Inissiaq attartugaq ineqarnermut immikkoortortamut attuumassuteqarpat ukiup ineqarnermut tapiissuteqarfusup ineqarnermut immikkoortortat ataasiakkaat ukiumoortumik naatsorsuutaat malissavai.

Imm. 3. Inissiaq attartugaq ineqarnermut immikkoortortamut attuumassuteqanngippat ukiup ineqarnermut tapiissuteqarfusup ukioq qaammatisiuteqarfusoq malissavaa.

Kapitali 2

Aqunneqarnera tapiissutinillu tunniussisarneq

§ 10. Ineqarnermut tapiissutininik qinnuteqaat uppersaatissat pisariaqartinneqartut ilaatillugit kommunalbestyrelsimut tunniunneqassaaq.

§ 11. Ineqarnermut tapiissutit pillugit kommunalbestyrelsi aalajangiissaaq.

Imm. 2. Inissiani attartortittakkani ineqarnermut tapiissutit aningaasanut aalajangersimasunut naatsorsorneqassapput attartortup ineqarnermut akiliutaani ineqarnermut tapiissutit ilanngaatigineqarlutik, taamaalilluni ineqarnermut tapiissutit ineqarnermullu akiliutit nikingassutaat kisimi attartortumit akiliutigineqassalluni.

Imm. 3. Ineqarnermut tapiissutit toqqaannartumik attartortitsisumut akilerneqartarput.

§ 12. Ineqarnermut tapiissutit qinnuteqaatip tunniunneqareerneratigut aamma piumasaqaatit naammassineqareernerisigut qaammatip 1-ni atuutilersumik tunniunneqassapput.

Imm. 2. Ineqarnermut tapiissutit qaammammumut siumoortumik tunniunneqassapput.

Kapitali 3

Utertitsisarneq

§ 13. Ineqarnermut tapiissutininik qinnuteqartoq tunineqartorluunniit paasisutissiisussaatitaanerminik saneqqutsisimappat ineqarnermut tapiissutit annertuallaartut tunniunneqartut akilersorneqarnissaat pillugit kommunalbestyrelsi aalajangiisinnavaq, tamanna § 6 naapertorlugu.

Imm. 2. Utertitsilluni akiliuteqarnissaq kommunalbestyrelsip aalajangerpagu pisortanut akiligassanik akiliisitsiniartarneq pillugu inatsisiliorneq atuuttoq malillugu aningaasat akilersinniarneqassapput.

Kapitali 4

Ineqarnermut tapiissutit atorunnaarsinnerat

§ 14. Ineqarnermut tapiissutisiat qaammatip ineqarnermut tapiissutisisinnaanermut piumasaqaatinik naammassinniffiusup naanerani unitsinneqassapput.

Imm. 2. Inissiamut allamut nuunnermi ineqarnermut tapiissutit atorunnaassapput, ineqarnermullu tapiissutit pillugit qinnuteqaammik nutaamik tunniussisoqassalluni.

Kapitali 5

Aningaasalersuineq

§ 15. Inatsit manna naapertorlugu ineqarnermut tapiissutinut aningaasartuutit 40%-ii kommunimit kiisalu 60%-ii Nunatta Karsianit aningaasartuutigineqassapput.

Imm. 2. Naatsorsuutininik saqqummiussisarnissaq kukkunersiuisarnissarlu pillugit malittarisassat Naalakkersuisunit aalajangersarneqassapput.

Kapitali 6

Naammagittaalliorsinnaaneq

§ 16. Aalajangiinerit, inatsimmi matumani malittarisassat malillugit aalajangiiffigineqartut, isumaginninnermut aqutsisoqarfik aaqqissuussaannerlu pillugit Inatsisartut peqqussutaanni malittarisassat

malillugit Isumaginninnermi Naammagittaalliuteqartarfimmut naammagittaalliutigineqarsinnaapput.

Kapitali 7

Atortuulersitsineq

§ 17. Inatsit januaarip 1-ni 2016-imi atuutilissaaq.

Imm. 2. Inatsisip atuutilersinneqarnera sioqqullugu ineqarnermut tapiissutit naatsorsorneqareersut piffissaq naatsorsuiffusoq naallugu ingerlassapput imaluunniit pissutsit allanngortut malillugit naatsorsoqqinneqarlutik, tamanna § 5 malillugu.

Imm. 3 Tamanna ilutigalugu Inissiani attartortittakkani ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq atorunnaarsinneqarput.

Imm. 4. Maleruaqqusat Ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq tunngavigalugu aalajangersarneqartut , malittarisassanik Inatsisartut inatsisaanni matumani inatsisiniluunniit allani aalajangersakkanik piginnaatitsisunik taarserneqarnissamik atorunnaarsinneqarnissamilluunniit tungaanut atuutiinnassapput.

Namminersorlutik Oqartussat, ulloq 7. december 2015

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut